

Žrtve mina iz BiH osvojile Triglav



Petorica žrtava mina iz Bosne i Hercegovine osvojili su Triglav, najviši vrh Slovenije.



U pitanju su Željko Volaš (1971.) iz Banje Luke, Mirko Zečević (1974.) iz Brčkog, Dragan Janjić (1962.) iz Trebinja, a Izet Kadrić (1958.) iz Bihaća i Ivo Marković (1964.) iz Brčkog.

Planinarski pohod, uz nadzor Alpskog saveza Slovenije i Alpskog saveza BiH, realizovan je 10. septembra,

dok se danas očekuje njihov silazak niz planinu.

Planinarski uspon na planinu Triglav realizovan je uz podršku ITF Slovenija na inicijativu Željka Volaša, bivšeg deminera, žrtve mine.

-Cilj planinarskog uspona bio je da se skrene pažnja na problem mina, kao i na položaj žrtava mina u BiH. Čak i kad se interes domaće i međunarodne javnosti umanju ili usmjeri u drugom pravcu, i dalje je potrebna briga i podrška u uspostavljanju i održavanju što aktivnijeg života i reintegracije u društvo. Uspon je bio i prilika da se podsjeti i na zemlje koje su potpisale Ottavsku konvenciju o zabrani proizvodnje i upotrebe mina, kako ne bi zaboravile dogovore i ciljeve koje su postavile i nastavile aktivno slijediti svijet bez mina – saopćeno je iz Organizacije amputiraca – UDAS-a.

U Bosni i Hercegovini se od početka rata dogodilo 8.358 minskih nesreća u kojima je poginulo 14 posto djece i sedam posto žena. Više od 75 posto žena su samohrane majke zbog visoke stope smrtnosti muškaraca tokom minskog incidenta.

Nakon rata bilo je 1.758 minskih nesreća u kojima je život izgubilo 615 osoba.

Tokom humanitarnog razminiranja u BiH se dogodile 123 radne nesreće u kojima su poginula 74 pirotehničara.

U 2018. godini u BiH su prijavljene tri minske nesreće u kojima je jedna osoba poginula, a tri osobe su povrijeđene.

-Nedostaju programi podrške i zakonski okviri za podršku žrtvama mina na nacionalnoj razini, tako da je teško integrirati preživjele žrtve mina u različite državne pomoći za osobe s invaliditetom. Istovremeno, nedostaje informacija o preživjelima od mina, koji često žive na margini društva i siromaštva. Veličina područja koje prijeti minama u BiH proteže se iznad 1.018 km², odnosno oko dva posto veličine zemlje. To znači 1.388 zajednica pogođenih minama, što direktno utječe na sigurnost 545.603 stanovnika ili 15 posto ukupnog stanovništva BiH – navodi se u saopćenju.

Organizacija amputiraca UDAS Banja Luka zahvaljuje svima koji su učestvovali u pripremi i realizaciji značajnog planinarskog pohoda u kojem su učestvovali žrtve mina iz BiH. Posebno zahvaljuju ITF Slovenije i Ottobock Sarajevo koji su obezbijedili finansijsku podršku za realizaciju ovog planinarskog pohoda. (Fena, tl)

Date: 11-09-2019